

CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E O CONCELLO DAS PONTES DE GARCÍA RODRÍGUEZ PARA A CONSTRUCCIÓN DUN CENTRO LOXÍSTICO NO CONCELLO DAS PONTES DE GARCÍA RODRÍGUEZ

En Santiago de Compostela, a 24 de outubro de 2023

REÚNENSE

A conselleira de Economía, Industria e Innovación, _____, nomeada polo Decreto 67/2023, de 14 de xuño, que actúa no exercicio do seu cargo e en función das atribucións que lle confire o artigo 34 da Lei 1/1983, do 22 de febreiro, reguladora da Xunta de Galicia e da súa presidencia.

_____, alcalde-presidente do concello das Pontes de García Rodríguez, elixido mediante acordo plenario do 17 de xuño de 2023.

As partes comparecentes recoñécense mutua e respectivamente a capacidade suficiente para asinar este convenio de colaboración e a estes efectos,

EXPOÑEN

PRIMEIRO.- Na provincia da Coruña o concello das Pontes de García Rodríguez é un dos mais afectados polo peche das instalacións e das centrais de produción de enerxía abocadas á finalización da súa actividade, influíndo esta nova situación negativamente no desenvolvemento e progreso do seu territorio.

SEGUNDO.- Para paliar na medida do posible os impactos negativos das novas políticas enerxéticas, a Xunta de Galicia e o Concello das Pontes de García Rodríguez, teñen a firme vontade de implementar novas iniciativas que contribúan ó crecemento económico deste concello, de xeito que poida afrontar da mellor maneira posible os novos desafíos que presenta o seu desenvolvemento sostible.

TERCEIRO.- Debido ao peche da central térmica, o sector do transporte sufriu graves perdas económicas. Dado que na zoa existe una gran cantidade de empresas e autónomos con vehículos de transporte de mercadorías por estrada que viron reducida a súa actividade case ao mínimo, a opción da construción dun centro loxístico no concello representa unha gran oportunidade para o mantemento e creación de emprego. Contar cun centro loxístico de calidade para o almacenaxe e posterior distribución do stock almacenado é unha gran oportunidade de crecemento tanto para as empresas que se encontran co problema de falta de espazo para almacenar stock, como para o sector do transporte por estrada.

CUARTO.- A Consellería de Economía, Industria e Innovación ten atribuídas competencias nos ámbitos da promoción e dinamización da economía.

QUINTO.- A Xunta de Galicia e o Concello das Pontes de García Rodríguez recoñecéndose as competencias mutuas e, de acordo co exposto, acordan subscribir este convenio de colaboración, que se rexerá polas seguintes

CLÁUSULAS

PRIMEIRA.- Obxecto

O presente convenio ten por obxecto establecer as liñas de colaboración entre a Consellería de Economía, Industria e Innovación e o concello das Pontes de García Rodríguez para a construción dun centro loxístico no Concello das Pontes de García Rodríguez.

SEGUNDA.- Proxecto de execución

A actuación recóllese no proxecto básico e de execución "Centro loxístico de As Pontes" redactado pola enxeñeira industrial Carmen González Martínez e que se xunta como anexo a este convenio. O centro loxístico consiste fundamentalmente en dúas naves anexas, unha para almacenamento loxístico e outra para almacenamento a granel, oficinas, báscula de pesaxe de camións e área de carga, descarga e manobra de camións, todo elo nunha parcela do polígono 2, sector 02, do parque empresarial de Penapurreira, no concello de As Pontes de García Rodríguez.

O Concello de As Pontes de García Rodríguez poderá solicitar a modificación das características do proxecto cunha antelación mínima dun mes á data de finalización do prazo de realización da actividade. A modificación poderase autorizar sempre que non dane dereitos de terceiros, se

respecte o obxecto da subvención, as actividades subvencionadas e evitando actuacións deficientes e incompletas.

Xunto coa solicitude, a entidade deberá presentar:

- a) Proxecto de execución modificado.
- b) Memoria xustificativa, na que ademais se faga constar que non se desvirtúa o proxecto inicial, que non suporá unha actuación deficiente e que se cumpre co obxectivo do convenio.
- c) Relación e identificación concreta dos cambios introducidos en cadro comparativo.

TERCEIRA.- Gastos subvencionables

Considéranse gastos subvencionables os gastos e investimentos relativos á creación dun centro loxístico no concello das Pontes de García Rodríguez, de acordo co establecido no proxecto básico e de execución "Centro loxístico de As Pontes" redactado pola enxeñeira industrial Carmen González Martínez e que se xunta como anexo a este convenio.

Os tributos serán considerados gastos subvencionables cando o beneficiario os aboa efectivamente consonte ao establecido no artigo 29.8 da Lei 9/2007, de 13 de xuño, de subvencións de Galicia. En concreto, o imposto sobre o valor engadido (IVE) poderase considerar gasto subvencionable cando a entidade beneficiaria acredite mediante a correspondente certificación que se encontra acollida ao réxime de exención do IVE.

Tamén son subvencionables os gastos de redacción do proxecto e de dirección de obra.

Considéranse gastos subvencionables os comprendidos entre o 1 de xaneiro de 2023 e a data de xustificación.

Con carácter xeral, considerarase gasto realizado cando se teña contabilizado o recoñecemento da obriga polo órgano competente do concello das Pontes de García Rodríguez, que estará obrigado a acreditar documentalmente a efectividade dos pagos realizados nun prazo máximo de sesenta días naturais contados a partir da data do ingreso na conta bancaria do beneficiario de cada un dos abonos da subvención concedida.

Non obstante, no caso de realizarse pagos anticipados como financiamento necesario para poder levar a cabo as actuacións subvencionadas, considerarase gasto realizado o que foi efectivamente

pagado polo Concello de As Pontes de García Rodríguez con anterioridade á finalización do período de xustificación.

CUARTA.-Axudas á inversión para infraestruturas locais

A axuda derivada da sinatura deste Convenio axústase ao regulado no artigo 56 do Regulamento (UE) 651 /2014 polo que se declaran determinadas categorías de axudas compatibles co mercado interior en aplicación dos artigos 107 e 108 do Tratado da UE, de modo que será compatible co mercado interior e a infraestrutura financiada porase a dispor dos interesados de xeito aberto, transparente e non discriminatorio.

QUINTA.- Obrigas do beneficiario

O concello das Pontes de García Rodríguez, como beneficiario, levará a cabo as actuacións obxecto do convenio, que é a construción dun centro loxístico no concello das Pontes de García Rodríguez, executando o proxecto básico e de execución "Centro loxístico de As Pontes" redactado pola enxeñeira industrial Carmen González Martínez e que se xunta como anexo a este convenio.

Así mesmo deberá cumprir cos seguintes requisitos ou obrigas:

1. Destinar o importe do financiamento do presente convenio ao obxecto e finalidade que se contén no mesmo.
2. Comunicar á Consellería de Economía, Industria e Innovación a obtención de subvencións e axudas para a mesma finalidade que a do presente convenio, procedentes de calquera outra Administración Pública ou de entes públicos ou privados, nacionais ou internacionais.
3. Achegar os informes e documentos que acrediten o desenvolvemento das actividades do presente convenio, así como os informes e demais documentos requiridos pola Consellería de Economía, Industria e Innovación.
4. Dar a adecuada publicidade do carácter publico do financiamento en todas as actuacións que deriven da execución destas actuacións, en cumprimento do artigo 15.3º da Lei 9/2007, de subvencións de Galicia.
5. De acordo co artigo 37 apartado 2.g) do Decreto 11/2009, do 8 de xaneiro, polo que se aproba o regulamento da Lei de Subvencións de Galicia, o concello das Pontes de García Rodríguez está

obrigado a facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións.

6. O concello das Pontes de García Rodríguez procederá ao reintegro, total ou parcial, dos fondos percibidos máis os xuros de mora devengados dende o momento da concesión ata o de reintegro, no suposto de incumprimento das condicións establecidas para a súa concesión, nos casos previstos no Título II da Lei 9/2007, de subvencións de Galicia.

7. Seguir as normas sobre protección de datos, concretamente a Lei Orgánica 3/2018, de 5 de decembro, de Protección de datos persoais e garantía dos dereitos dixitais e as normas que a desenvolven.

8. Acreditar ante a Consellería de Economía, Industria e Innovación, con anterioridade a sinatura do presente convenio, que se atopan ao corrente das obrigas tributarias e da seguridade social, para o que poderá presentar unha declaración responsable consonte ao artigo 11 do Decreto 11/2009, do 8 de xaneiro, polo que se proba o regulamento da Lei de subvencións de Galicia.

9. Cumprir cas esixencias do Decreto 193/2011, de 6 de outubro, polo que se regulan especialidades nas subvencións ás entidades locais galegas. En particular, deberá acreditar ante a Consellería de Economía, Industria e Innovación, con anterioridade á sinatura do presente convenio, ter cumprido co deber de remisión ao Consello de Contas das contas xerais.

10. Cumprir co resto dos requisitos e das obrigas recollidas no artigo 11º da Lei 9/2007, do 13 de xuño, de subvencións de Galicia.

11.- Acreditar ante a Consellería de Economía, Industria e Innovación que non está suxeito a unha orden de recuperación pendente tras unha decisión previa da Comisión

SEXTA.- Obrigas da Consellería de Economía, Industria e Innovación

1. A Consellería de Economía, Industria e Innovación, por medio da Secretaría Xeral de Industria, achegará ao concello das Pontes de García Rodríguez, na súa calidade de beneficiario, o 25% do importe total considerado como subvencionable e cun máximo de 249.262,65 euros, con cargo á

partida orzamentaria 05.02.732A.760.0, código de proxecto 2023/00006 da devandita Consellería, ao levar a cabo as actuacións obxecto do convenio.

2.- Calquera modificación das cláusulas do presente convenio deberá ser solicitada á consellería, quen decidirá sobre a súa procedencia, e no caso de aceptarse se levará a cabo á súa formalización mediante a correspondente "addenda", consonte ao artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

3.- No caso de que o investimento realizado teña un custo inferior ao inicialmente previsto e sempre que isto non supoña unha realización deficiente da totalidade do proxecto, a contía da subvención reducirase proporcionalmente, manténdose constante a porcentaxe da axuda respecto ao custo total do investimento.

SÉTIMA.- Subcontratación e os seus límites.

A subcontratación dos servizos necesarios para acometer as actividades a desenvolver ao abeiro do presente convenio poderá acadar ata o 100 % das mesmas, e realizarase de acordo aos límites e obrigas establecidos no artigo 27 da Lei 9/2007, de 13 de xuño, de subvencións de Galicia e no artigo 43 do seu regulamento. En todo caso, a Consellería de Economía, Industria e Innovación poderá comprobar, dentro do período de prescrición, o custo así como o valor de mercado das actividades subcontratadas.

De conformidade co apartado 3 do artigo 27 da Lei 9/2007, de 13 de xuño, cando a actividade concertada exceda do 20 % do importe da subvención e o dito importe sexa superior a 60.000 € a subcontratación deberá cumprir os requisitos seguintes:

- Que o contrato se celebre por escrito.
- Que a celebración do mesmo se autorice previamente pola Consellería de Economía, Industria e Innovación.

OITAVA.- Vixencia.

Este convenio entrara en vigor o día seguinte ao da súa sinatura e estenderá a súa vixencia ata o 31 de decembro de 2023.

Admitiranse actividades do presente convenio anteriores a súa sinatura levadas a cabo dende o 1 de xaneiro de 2023.

NOVENA.- Pagamento e anticipos

1. Os pagamentos anticipados suporán entregas de fondos con carácter previo á xustificación, como financiamento necesario para poder levar a cabo as actuacións subvencionadas, de acordo co establecido no artigo 31.6 da Lei 9/2007, do 13 de xuño, de subvencións de Galicia, nos artigos 63, 65 e 67 do Decreto 11/2009, do 8 de xaneiro, polo que se aproba o regulamento da dita lei, e no artigo 6 do Decreto 193/2011, de 6 de outubro, polo que se regulan especialidades nas subvencións ás entidades locais galegas, quedando suxeitos ás seguintes condicións:

- a) Poderase anticipar ata o 50% do importe da subvención concedida.
- b) A concesión do anticipo realizarase mediante resolución motivada tras a xustificación da súa necesidade polo beneficiario.
- c) O beneficiario deste Convenio quedará exonerado da constitución de garantía, segundo o disposto no artigo 65.4.c) do Decreto 11/2009, do 8 de xaneiro.

2. O beneficiario deberá achegar coa solicitude de anticipo a seguinte documentación:

- a) Declaración complementaria do conxunto das axudas solicitadas, tanto as aprobadas ou concedidas como as pendentes de resolución destinadas ao financiamento do mesmo proxecto, das distintas administracións públicas, entes públicos ou privados, nacionais ou internacionais, indicando a súa contía.
- b) Declaración responsable do solicitante de estar ao día no cumprimento das obrigas tributarias e fronte a Seguridade Social e de non ter pendente de pagamento ningunha outra débeda coa Administración pública da Comunidade Autónoma de Galicia, segundo o disposto no artigo 11 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

3. O pagamento do importe restante do anticipado realizarase unha vez xustificada a realización das actuacións obxecto do convenio.

DECIMA.- Compatibilidade con outras axudas

Consonte ao establecido no artigo 40.1.d) do Decreto 11/2009 que establece o Regulamento que desenvolve a Lei 9/2007 de subvencións de Galicia, establécese a compatibilidade da axuda concedida neste convenio con calquera outra destinada ao mesmo fin, calquera que sexa a súa natureza e a entidade que a conceda sempre que, conxuntamente, non superen o custo da actividade subvencionada.

Asemade, de acordo co establecido no artigo 11º, apartado d) da Lei 9/2007 de subvencións de Galicia os beneficiarios deberán cumprir coa obriga de comunicar á Secretaría Xeral de Industria cantas axudas, subvencións, ingresos ou recursos sexan obtidas para financiar adicionalmente estas mesmas actividades.

DÉCIMO PRIMEIRA.- Prazo e forma de xustificación

1 A data límite para a presentación da correspondente xustificación da realización das actividades do presente convenio será o 30 de novembro de 2023. Admitiranse os xustificantes de gastos realizados dende o 1 de xaneiro de 2023 ata o 30 de novembro de 2023.

A documentación necesaria para a xustificación é:

1.1 Certificación expedida pola Secretaría do concello das Pontes de García Rodríguez, co visto e prace do alcalde-presidente, relativa á aprobación polo órgano competente da conta xustificativa da subvención en que se faga constar, como mínimo, de forma detallada:

a) O cumprimento da finalidade da subvención

b) Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: identificación do/a acreedor/a, número de factura ou documento equivalente, importe, data de emisión e data do recoñecemento da obriga polo órgano competente.

1.2 Facturas orixinais das actuacións realizadas. Cando o beneficiario non dispoña de facturas electrónicas, deberá aportar unha copia auténtica electrónica da factura orixinal en papel, de acordo cos procedementos que establece a normativa reguladora do procedemento administrativo común.

Non obstante, no presente procedemento, admitiranse as facturas orixinais en papel ou copias debidamente compulsadas, no caso de imposibilidade funcional e/ou tecnolóxica por parte da Administración para emitir copias auténticas electrónicas.

1.3 Xustificante de pago das facturas mediante transferencia bancaria, certificación bancaria ou extracto de pagamento comprendido entre a data de inicio e a data límite da xustificación. Nestes documentos deberán quedar claramente identificados o receptor e o emisor do pagamento. Non se admitirán os pagamentos en efectivo así como os xustificantes obtidos a través de Internet se non están validados pola entidade bancaria ou dispoñen de códigos para a súa verificación por terceiros na sede electrónica da dita entidade bancaria.

1.4 Certificación de obra.

1.5 Certificado da Secretaría do concello das Pontes de García Rodríguez no que se indique que o procedemento de contratación pública realizouse consonte á Lei 9/2017, do 8 de novembro, de contratos do sector público, e onde se indique ademais o adxudicatario do contrato e o importe de adxudicación.

1.6 Certificado da secretaría ou intervención do concello das Pontes de García Rodríguez onde se sinala que o IVE subvencionado non é recuperable por parte do concello beneficiario.

1.7 Informe técnico no que se describa a realización total do proxecto e os datos e incidencias máis significativas na súa execución, asinado por técnico municipal.

1.8 Declaración actualizada do conxunto das axudas solicitadas, tanto as aprobadas ou concedidas como as pendentes de resolución destinadas ao financiamento do mesmo proxecto, das distintas administracións públicas, entes públicos ou privados, nacionais ou internacionais, indicando a súa contía.

1.9 Declaración responsable de estar ao día no cumprimento das obrigas tributarias e fronte a Seguridade Social e de non ter pendente de pagamento ningunha outra débeda coa Administración pública da Comunidade Autónoma de Galicia, segundo o disposto no artigo 11 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

2. Transcorrido o prazo establecido de xustificación sen ter presentado esta perante o órgano administrativo competente, este requirirá ao beneficiario para que no prazo improrrogable de dez días a presente. A falta de presentación da xustificación no prazo establecido neste parágrafo comportará a perda do dereito ao cobramento total ou parcial da subvención, a exixencia do reintegro e demais responsabilidades establecidas na Lei de Subvencións de Galicia. A presentación da xustificación no prazo adicional establecido neste parágrafo non eximirá o beneficiario das sancións que, conforme a Lei, correspondan.

3. Os órganos competentes da Consellería de Economía, Industria e Innovación poderán solicitar as aclaracións ou informes relativos á xustificación do investimento que consideren convenientes. No caso de que non fosen remitidos polo beneficiario dentro do prazo que se sinala, entenderase que renuncia á subvención.

DÉCIMO SEGUNDA.- Control

1. A Consellería de Economía, Industria e Innovación poderá facer as actividades de control que considere oportunas para controlar o cumprimento das subvencións.

2. Alén do anterior, as subvencións estarán sometidas á labor interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, subvencións de Galicia e o Decreto 11/2009, do 8 de xaneiro, polo que se aproba o Regulamento da lei 9/2007, do 13 de xuño, de subvencións de Galicia.

3. Así mesmo, estarán sometidas ás actuacións de comprobación previstas na lexislación do Tribunal de Cuentas e do Consello de Contas, coa obriga por parte dos beneficiarios de achegar tanta documentación lle sexa requirida no exercicio das anteriores actuacións.

DÉCIMO TERCEIRA- Publicidade

1. As partes asinantes deste convenio consenten expresamente o tratamento dos datos relevantes deste convenio, incluídos os datos de carácter persoal, e a súa publicación no Diario Oficial de Galicia e/ou na páxina web da Consellería de Economía, Industria e Innovación, de acordo co establecido na normativa reguladora das subvencións e no artigo 17 da Lei 1/2016, do 18 de xaneiro, de transparencia e bo goberno, coas excepcións previstas no artigo 15.2º d) da Lei 9/2007, do 13 de xuño, de subvencións de Galicia así como, no seu caso, na Base de Datos Nacional de Subvencións, que opera como sistema nacional de publicidade de subvencións.

2. Do mesmo xeito, de acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos de axudas, subvencións e convenios e de sancións da Xunta de Galicia, as partes asinantes deste convenio consenten expresamente a inclusión e publicidade dos datos relevantes nos rexistros públicos que proceda.

3. En toda a información e publicidade das actividades obxecto deste convenio farase constar, nun lugar destacado, a colaboración da Consellería de Economía, Industria e Innovación e utilizaranse, cando proceda, a imaxe corporativa institucional da Xunta de Galicia.

DÉCIMO CUARTA.- Comisión de seguimento

Coa finalidade de coordinar as actividades necesarias para a execución do presente convenio e velar polo cumprimento do seu obxecto, constituirase unha Comisión de Seguimento, composta por un representante de cada unha das partes asinantes do presente convenio, con nomeamento de titular e suplente.

DÉCIMO QUINTA.- Confidencialidade

O beneficiario comprométese a manter a confidencialidade de toda a información facilitada que teña dito carácter.

Cando o beneficiario desexe utilizar algún dato que teña carácter de confidencial para a súa publicación ou difusión, deberá solicitar a autorización da Consellería.

DÉCIMO SEXTA.- Relación contractual

A subscrición do presente convenio non leva consigo relación laboral, contractual ou de calquera outro tipo entre os profesionais que vaian desenvolver as actividades a desenvolver no presente convenio e a Xunta de Galicia, de maneira que non se lle poderá esixir responsabilidade algunha, nin directa nin subsidiaria, polos actos ou feitos acaecidos no desenvolvemento do mesmo.

DÉCIMO SETIMA.- Perda do dereito ao cobro e reintegro da axuda

1. Producirase a perda do dereito ao cobro da axuda ou, no seu caso, procederá o reintegro da mesma cos intereses correspondentes, nos supostos e termos establecidos no artigo 33 da Lei 9/2007, do 13 de xuño de subvencións de Galicia.

2. O reintegro das axudas rexerase polo establecido no Título II da Lei de subvencións de Galicia e no Título V do Regulamento da devandita Lei.

3. Na gradación dos posibles incumprimentos que determinen a perda do dereito ao cobro ou o reintegro das axudas, teranse en conta os seguintes criterios:

a) Cando o cumprimento polo beneficiario se aproxime de modo significativo ao cumprimento total e se acredite por este unha actuación inequivocamente tendente á satisfacción dos seus compromisos, a cantidade a reintegrar virá determinada pola aplicación dos seguintes criterios de proporcionalidade:

1.º O incumprimento dos obxectivos parciais ou actividades concretas da actuación levará a devolución daquela parte da axuda destinada ás mesmas.

2.º A realización de gastos fora do prazo de execución, suporá a devolución das cantidades investidas fora de prazo.

3.º A non presentación das correspondentes xustificacións, de acordo co establecido nas cláusulas do presente convenio, levará a devolución das cantidades percibidas e non xustificadas, logo do requirimento establecido no punto 2, artigo 45 do Regulamento da Lei 9/2007, de 13 de xuño de subvencións de Galicia.

b) O incumprimento total e manifesto dos obxectivos establecidos no presente convenio será causa de reintegro total da axuda.

DÉCIMO OITAVA- Resolución

Serán causas de resolución do presente convenio, procedendo ao reintegro, total ou parcial, da axuda percibida e dos xuros de demora correspondente dende o momento do pagamento de toda a subvención ata a data na que se acorde a procedencia do reintegro, as determinadas no artigo 33 da Lei 9/2007, do 13 de xuño.

En especial, son causas de resolución do presente convenio as seguintes:

- A desviación dos fondos outorgados para outra finalidade distinta da sinalada neste convenio.
- O incumprimento da obriga da xustificación do investimento realizado.
- O incumprimento de calquera outra das cláusulas establecidas no mesmo.
- O transcurso do tempo estipulado sen que se desenvolva o mesmo.
- O acordo mutuo das partes.

DÉCIMO NOVENA.- Natureza e resolución de conflitos

O presente convenio ten carácter administrativo. Correspóndelle á conselleira de Economía, Industria e Innovación a interpretación do mesmo e a resolución das dúbidas que xurdan sobre o seu cumprimento, sendo os acordos tomados neste sentido inmediatamente executivos. As

posibles cuestións litixiosas serán de coñecemento e competencia da orde xurisdicional contencioso-administrativa de conformidade coa lei reguladora de dita xurisdición.

VIXÉSIMA.- Supletoriedade

O presente convenio queda excluído do ámbito de aplicación da Lei 9/2017, de 8 de novembro, de Contratos do Sector Público, sen prexuízo da aplicación dos principios do devandito texto legal para resolver as dúbidas e lagoas que puideran presentarse.

O presente convenio rexerase polas súas propias cláusulas e en todo o non recollido nelas aplicárase o disposto para esta materia na Lei 9/2007, do 13 de xuño, de subvencións de Galicia e demais normas de dereito administrativo.

Tendo lido o presente convenio e, en proba de conformidade, asínase por todas as partes no lugar e data ao principio indicados.

Pola Consellería de Economía, Industria e Polo concello das Pontes de García Rodríguez
Innovación

Mª Jesús Lorenzana Somoza

Valentín González Formoso